




DELHI MIZO INKHAWM

BIBLE STUDY LEH BEIHRUAL 2025



Thuzir : Hebrai

Buatsaihtute:

Dr. A. Zothansanga

Dr. Rema Chhakchuak

BEIHRUAL THUZIR ZIRLAI 8-NA PATHIAN LÂWM ZAWNG RAWNGBAWLNA Hebrai 13

Hebrai ziaktu hian awmdan tur, tih dan tur, *practical living* kan tih bung 13-ah hian a sawi ðeuh mai a. Heng kan chhiar hian Hebrai ziaak chhan, tute tana ziaak nge tih, a *context* kan hre reng tur a ni. Hebrai hi Thuthlung Hlui rawngbawlna ngaih lutute, Isua ringtu Juda sakhuaa lêt leh duhna rilru nei te, lêt mêkte tan Isua chungnun zia, Juda sakhaw serh leh sâng ngei pawhin amah Isua ngei chu min kawh hmuh a tum ber a nih zâwk zia ziaakna bu a ni.

Pathian Rawngbawlna (13:1-19)

Unau inhmangaihna (philadelphia) hi awm zêl rawh se, tiin bul a ðan a. An inhmangaih tih a lang a, chhawm nung zêl turin a chah a ni (v.1). ‘Mikhual’ a tih hi ringtu an hriat ngai loh, Juda sakhua la ngaisangtute pawh an ni thei a. ‘Vantirh koh hre lovin an thleng reng thei’ a tih hian Abraham a’n mikhual a thlen chungchang Genesis 18 thu ami kha a rilruah a awm a ni thei a. Tin, Gideona chungchâng Roreltute 6 ami pawh kha a ni thei âwm e (v.2). Phuar leh hrehawm tuarte chu mahni ngeiin kan tuar ve angin khawngaih turin (*empathy*) a ti a. Lalpa ngei khan ðanpui ngaite puih kha (Matthaia 25:40) amah puiah a sawi anih kha (v.3).

Inneih chawimawia a awm a duh tâwk mai lo va, khum pawh tihbawlhhlawh loh tur, a ti a. Uire chauh ni lo, inngaite (*sexually immoral*) pawh 'Pathianin a ngaihtuah dawn' a ti. Khang hunlai pawh khan midang nupui lo mutpui chu thil loh tura ngaih a ni. Hmeichhe dang zawng erawh chu mutpui thiang vekah an ngai thung. Hebrai ziaktu hian a hunlai khawtlang, society pawm dân hnâwlin, Pathian remruat dân huai taka ziakin, 'Inpâwlna (*sex*) hi nupa inkar chauha hman tur a ni', tiin a sawi a ni (v.4).

Sum ngaina lo turin a chah a, an neih chhuna lungawi turin a ti a ni. 'Mi hausaw ber chu pawisa ngah ber hi a ni lo a, mamawh nei tlêm ber hi a ni,' ti tein an sawi bawktin. '*Eng tikah mah ka thlahthlam tawp lo vang chia, kal pawh ka kalsan tawp lo vang che,*' tih hi Mosian Joshua leh mipuite a fuihna Deuteronomy 31:6 leh Pathianin Joshua a fuihna Joshua 1 ațanga lâk a ni a. '*Lalpa chu mi tanpuitu a ni, Ka hlau lo vang; Mihringin eng nge mi tih theih ang?*' kan ti thîn a ni, tih hi Sam 118:6 thu kha a ni. Hengte hian neih chhuna lungawina hi Pathian ațanga chhuak a nih zia a târlang chiang hle mai. Thuthlung Hluia thutiam, *promise* kan hrilhfiaw dan hei hian min zirtir thei awm e. Pathian tiam, malsâwmna hi neih tam deuh deuh aiin kan neihsa hlut a, lâwm a, Pathian ațanga kan hmuh a nih zia hriat lam zawk hi a ni. Pathian thutiam zawng zawng Isua-ah chuan 'a ni' tih a ni tih kan hmu a (2 Korinth 1:20). Petera chuan Pathian thil min pête chu a

nungchang kan ðawm theihnan a ni, a ti bawk (2 Peter 1:3,4). A awmzia chu Pathian hian kan rinna a ðhan zel theihnan, Isua kan an theih deuh deuhnan hian engmah a ui lo a ni. A malsawmna hi Isua kan an telh telhna tura min pêk a ni tih kan zir thei awm e (v.5,6).

An hotute awm dan zir turin a ti a. Ringtu hmasate, apostolte, Isua rin avanga thih huama an awm dan hre renga an thil tawnah chhel turin a fuih a ni. Isua zuitu zirtu ni turin a fuih a ni. An hotute thu a kawî a ngila zawm lam aain Chanchin T̄ha hrilhtute an ni a, an awmdan chuan an hotute hnathawh a tihlan avangin an thu awih turin a ti a ni. Hruaitu t̄ha leh an hruaite t̄hat a pawimawh ve ve a ni tih kan hre thei a ni (v.7,17). Isua hi niminah, wawiinah, kumkhua pawhin a pangngai a ni, tih kan hmu a. Thuthlung Hlui hunlai pawhin Isua hnathawh avanga mite hruai an ni a, tunah pawhin ama hruai kan ni a. Hun lo kal zel turah pawh engkim hi Isuaa innghat a ni tih a sawi a ni (v8). Zirtirna dik lo, ei leh in, sum leh paia kan nun insawhngheh tum aain Pathian khawngaihnaa ngheh hi a hlu zawk a ni (v.9).

Inhlanna Ni, *Day of Atonement (Yom Kipur)* (Lev. 16, 23, Numb. 29) hi inhlanna ni ropui ber a ni a. Pathian nen inremna ni a ni a, rante hlanin hun an hmang t̄hin. T̄hla sarihna (*Tishri*) ni s̄awm ni (mid-September) ah an nei t̄hin. He mi ni hian kel pakhat sual thawinan an talh a, pakhat thlalerah an chhuah t̄hin (*azazela*). Sual thawina rante thisen chu maich̄amah an t̄at a, saruangte chu

daipawnah an kalpui a, an hal ðin. A hâltu chuan a thawmhnaw a su a, a inbuala, khuaah a lut leh ðin (Lev. 16:27,28). Hebrai ziaktu hian Isuan heng zawng zawng hi a takin a rawn hlen chhuaka, daipawnah kan tan Pathian nen inremna siamin, hmuhsitna tuarin, khenbehin a awm a ni, a ti. Chuvangin Thuthlung Hlui inhlanna, inthawina khawchhung chu kalsan tawh i la, khaw pawnah inthawina tak hlentu Isua hnen i pan ang u, tiin a sawm a ni (v.10-15). Isua ringtute thil tih ðat leh thil phal inthawina chu Pathianin a pawm êm 3m a ni (v.16). Engkimah fel taka an awm theihnan, an hnêna rang taka tirh a nih theihnan ðawngtaipui turin a sawm bawk a ni (v.17,18).

Malsâwmna leh chibai bûkna (13:20-25)

A thu ziak chhiartute tân malsâwmna Hebrai ziaktu hian a dilsak a. Pathian chu tu nge, eng nge a tih, eng nge an tih turte a sawi a ni. Pathian chu remna Pathian a nih ziaian bul a ðan a. Isua hi Beramvengtu a ni a, a thisen zara mitthi zinga kaihthawh a ni, a ti. Hei hi a pawimawh khawp mai. Isua thihna ata kaihthawh a nihna chhan kha, a thisena tlanna, Pathian nêh inremna a siam vang a ni. Thil dang vang ni lovin sual hlannan a thih avanga kaihthawh a nih chu (v.20). Pathian duhzawng tinreng tia, kawng engkima an famkim theihnan a dil a, Isua hnenah ropuina a hlan a ni (v,21). Thu tlênte chauh a ziak tiin a sawi a! Timothea chhuah a nih thu a sawi a. Timothea nêh anmahni hmuh a duh thu a sawi a (v.22,23). An hotute leh mithianghlimte chibai a buk a, a hnena miten chibai an

bûk thu a sawi a, an tan khawngaihna dil sakin a thu ziak a tlip ta a ni (v.24,25).

Chângvawn: Hebrai 13:11-14

Ran, a thisen puithiam lalberin Hmun Thianghlina sual tâna hlana a luhpui ðhina ruangte chu, dai pâwnah an hâl ðhin si a. Chutichuan, Isua pa-whin, ama thisen ngeia mite chu a tihthianghlim theihna tûrin, kulh kawngkhâr pâwn lamah chuan a lo tuar ta a. Chutichuan, amah an hmuhsitna chu phurin dai pâwnah a hnên lamah i kal chhuak ang u. Hetah hian khaw hmun nghet kan nei si lo va, khaw lo la awm tûr chu kan za-wng zâwk a ni.

Sawihô tûr:

1. Thil hi neih belh zel nge i lungkham, i neihchhun chungah lungawina i zawng? Eng hian nge i rilru luah hnem ðhin zawk, mamawh hriatna nge Pathiana lungawina?
2. I hmangaihte tan eng nge i dilsak ber ðhin? Eng nge i tana dil tura ðawngtaipui i duh?
3. Tûn kuma Hebrai i zir aţanga i hlâwkna, Pathian thu i hriat fiah tâk, i chîn thar, i sim tak engte nge ni?